

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojitiajaca

1 ¹¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohuatanura, taa na Que Pueyaso paniquiaaricuajani. Niaacuara naajiyani-jia, canapue Pueyaso saquiriojoquiaari tama neracuajani, canapueete Jesucristo tojitianaacuajani. ²Pa Que Pueyaso, mariyata pa Jiyaniijia Jesucristo cuaara taraajeera niaacua, maninia na miiniuria niajaniya. Nojori cuaara cajitiiria nioojia pueyaracaanujuhua.

Taa Pueyaso miiquiaa pajaniyani Cristo rupuesano pa quishacari

³Pa Jiyaniijia Jesucristo Queeri Pueyaso. Nojuaja pa shuquiritiare. Neyanu Jesucristo pa rupenuucua, Pueyasoori capora pajaniyara. Nojuajaari jiyanhua maninia miiquiaa pajaniya, puetunu jiyocuacaanu na jiitiasano cumaacatajanaa. ⁴Pueyaso niishishacari taa Neyanu miiniutianiya pocuarani, jiya shipiniyaquishacarijia, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaarijiaariuhua na tojijiaca pa quiniuria, tojetaarucujanaa sesa miyashijia pa quiniuriajuhuaj. ⁵Panijia na quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa

tariucuacaanu na niishiriojoquiaari na miiniuria pajaniyacujani. ⁶Jiyanhua maninia na panishano Niyanuniyojua miiniuucua pocuara, nojuajaari pueyara-caanu jiyanooquiaa pajaniya. Nojuajaari jiyanhua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaa-ni. ⁷Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitonu quiniutianiya pajaniya. Puetunu sesa pa miishanojinijijianaa pa jiyanoo-quiaariiri. ⁸Pueyasoori na paniniu niishitiquiaari pajaniya, na niquitiosacari na niishitija pajaniya, puetunu casaa niishijiajanaa pa quiniuria. ⁹Nojuajaari jiyanhua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniujia, nojuajaari jiyasohua na miiniu panishano niishitiquiaari pajaniya. ¹⁰Pueyanaa, nia niishiri casaa Pueyaso miiniutianiya. Nojuajaari Cristo jiyatenutaniya Jiyaniijiajanaa na quiniuria. Naacuajitij, puetunu jiyocuacaanu quijiacajanaa, mariyata puetunu mijiria quijiacajanaari na tojijiacara quiniutianiya. Nojuajaari naa tohuateenutaniya tamacari, taa tamajaaja na niishiriojoquiaaricuajani.

¹¹Pueyasoori tariucuacaanu pa saquiriojoquiaari Neyanutaja na cojiritia-

nura pajaniya, maninia na miiniuria pajaniya. Pueyasojuanaari tariucuacaanu naa niishiriojoquiaari maninia na miiniuria pajaniya. Nojuajaari pueyara-caanu tohuateequiaa taa na miiniu paniquiaaricujani, niishijia na quiniuucua. ¹²Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujuanaa Jesucristoocua tiuquiaarini. Naa jiyanhua maninia Pueyaso miiniuucua canaa, nojuaja cuara maniniuhuaqueetasaria jiyanhua. ¹³Quiari naataja nia tojishacari Jesucristo rupaa, niaari cuno seetanu rupaacuajanaa tiuquiaarijihuhaj, Pueyaso muerasura jatanishano nia quiniuria. Naa nocua nia tiuuniuucuatej, Pueyasoori Neyanu nia rpuetequiaari. Na Sohuanu niqutioquiaari niajanijajaa-riuhaj taa na sequequiaaricujani. Naacuaji niishishaaquiaari, niaari seetanujanaa Pueyaso muerasu. ¹⁴Pueyaso Sohuanuraca pa quishacari, paacuajaari niishiyani, paari puetunu Pueyaso sequesano Neyanuranajuanaa masenutaniya Neyanutajuhaj. Pueyaso Sohuanu pa jiitiasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaninya juhua Neyanu pa niqushaanurajuhaj. Cunora, Pueyasoori jiyanhua maniniuhuaqueetasano quiniutianiya, jiyanhua maninia na miiniuucua pajaniya.

**Taa Pablo secojoquiaari Pueyaso
pueyacuarani**

¹⁵Janiyari niajanijajiniji tojiriucuaani, taa pa Jiyaniijia Jesuucua tiuujia nia quiyani, taa parta Pueyaso pueya panijia nia quiyajaanuhaj. ¹⁶Cunora, pueyaracaanu cua secojosacari niaacuara, majaari cua tarinitianu quiquiaa Pueyaso

cua sequenura “paacarasho”, maninia na muerasu nia quiniuucua. ¹⁷Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura niajanija jiyocuacaanu niishitaja. Naacuaji nia naata niishiniu na niishitiniu panishano niajanija, maninia nia niishiniuria nojuajuhaj. ¹⁸Janiyari niaacuara secojoquiaajaanuhaj, Pueyaso cuara cuhuataara nioojia, maninia nia niishiniuria casaara Pueyaso saquiriojoquiaari niajanijani, casaa na miiniutianiya niaarajanuhaj. Janiyari niaacuara secojoquiaajuhaj, maninia nia niishiniuria taa Pueyaso muerasu jiyatesaanutaniya shacantuca quijiaa nojori quiniuriani. ¹⁹Janiyari secojoquiaajuhaj, Pueyaso cuara niishitiria na cumaaca niajanija, cuno, nioojiajinia poonijiyani. Na cumaacaari jiyanhua, puequeyashijia. ²⁰Pueyasocua-jaari cuno na cumaaca poonitijioquiaari Cristo quetejinia, nojuaja jaara na samiitianiquiaarihua macujiniji. Jaara na samiitianiquiaari, cuno na cumaacata na cajitiquiaariiri Jiyaniijiajanaa cajitijinia na miaquetajara jiyocuacaanu. ²¹Tii na cajitiquiaariiri puetunu tamasa cumaacaraca quijiaa Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasa jiyaniijanucujanaa Jiyaniijia. Puetunu mijiria quijiaa jiitiasanojuanaari na casaa. Nojuajaari puetunu casaajanaa camar. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianijuhaj, taa quiarijia na quiyacuajani. ²²Naacuajitij, Pueyasoori puetunu na shipinishanojuanaa jiyatequiaari Jesucristo jiitiasocoriquiano. Naajuhaj, Pueyasoori Jesucristo jiyatequiaari na saquiriojosano pueya jiitiariquiano, canapuee nocua

tiuujiacacuajani. ²³Pueyaso saquiriojosa-no pueyari juhua Jesucristo cuaqueya. Nojuajaari juhua poojia saniniuujia, pa jiitiana na quishacari. Puetunu Pueyaso saquiriojosano pueyajanaa jaara Cristo cuaqueyajinia rupuetesaare, Cristo cuaqueyari tucuateenutaniya seetanujua-naa maninia jeecanamitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhuj, nojuajaari puetunu tiqiyocujanaa quijiajuhuanajaj.

**Panijia Pueyaso quiniuucua,
nojuajaari pa jyanooquiaari**

2 ¹Sesa miijia nia quiniuucua tarjia, Pueyaso tojiyashijiacajuhuj, niaari macunucua quijia Pueyasora. ²Niaa jaara naa sesa miijia quiquiaariti, niaari juhua puetunu mijiria quiniaa Pueyaso tojiyashijiacajanaa quiquiaari. Niaari samaruhua jiyaniijia tojiijia quiquiaari, cuno, paratu piyarojosaqui quijiani. Nojuajaari Pueyaso tojiyashijia shiniujiujia, nojori miiniuria sesa, taa Sesaaca seque panyacuajani. ³Tarjia, puetunu pajaniyajanaari Pueyaso tojiyashijia quiquiaarini. Paari tama pa miini panishanojuaja miijia quiquiaarini. Naacujiti, paari puetunu pa cuaqueya miini panishanojuanaa miijia quiquiaarini, puetunu sacuaratia pa niishiriojosanojuhuaj. Naa sesa miijia pa quiniuucuatej, paari tojetaarucujanaa jyanohua Pueyaso saniitosocoriquiano quiquiaari juucuan, juhua tamacajuhuj. ⁴Saniniuujia, Pueyasoori pocua taraajeja cutara. Jyanohua pa paniquiaari. ⁵Cunora, macunucua pa quishacarijia nera, sesa miijia pa quiniuucua, nojuajaari Jesucristota pa cojiritiaquiari samiitiani-jionu. Jyanootio Pueyaso quiniuucua, nojuajaari nia jyanooquiaari. ⁶Naa na samiitiani-ionuucua pajaniya Cristoo

pa tiuuniuucuatej, Pueyasoori tari pa tacanijioquiaari Cristota jiyocuaaanu, tii Cristo cajitianura pajaniya. ⁷iNaa Cristota na cojiritianuucua maninia miini pajaniyatej, cunoori jyanohua maninia! Nojuajaari naa pa miiquiaariti, puetunu quijiacajanaa nio pa quishacari nuhuaji niishiniuria maatia, Pueyasoori jyanohua pa panijia. Maatia niishishaanutaniyari Pueyasoori tojetaarucujanaa jyanootio cutara, na jyanooniuucua pajaniya, Neyanuucua pa tiuuniuucua. ⁸Naa Pueyaso quiniuucua jyanootio tej, nojuajaari nia jyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jyanootini quiquiaari tama niajaniyajaja. Pueyasojuanacuajaari nia jyanooquiaari niaacua na taraajenuucua. Naajuhuj, nojuacuajaari nia tiutitiquiaari Neyanuucua. ⁹Majaari Pueyaso jyanooniu quiquiaari pajaniya, maninia miijia pa quiniuucua. Paa jaara maninia pa miiniucua Pueyaso jyanootitiquiaari tama pa cuaqueyajaajani, paa maara tama pa cuaqueyajaaja timitiaren juhua najuhua pocuaja. ¹⁰Shushajanaa Jesucristooqua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijia pa quiniuria. Nojuacuajaari tari naa niishirioquiaari, maninia miijiacara na jataniniuria pajaniya.

Jesucristoori pa jiyateja jyanootiojuacara

¹¹Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuaaanuni, Pueyaso muerasu nia quiaquishacarijia. Niaari cuarta Judiucua soosano taucua quiquiaari, nia cararaatiuuquia co miatesoo quiaquiniuucua. Canaa cutaraari canaa cararaatiuuquia co miatesanoni. ¹²Nia niishirijuhuj, naa nia quishacariti, niaari Cristooju

quiquiaari. Majaari nia naata rupenu quijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia niishiniu quiquiaari Pueyasoori pueyacuaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. ¹³Tarjia, niaari seetanujuanaa tucuaaanu quijiaca quiquiaari Pueyasojiniji. Quiarjia saniniuuja, Jesucristo shootenuucua na nanaca niyacutesanojinia, niaari nata rupuetootesaquaaari, nocua nia tiushacari. Naacuajitij, niaari canaa rupuejacajuhua. ¹⁴Cristocujajaari pa jiyanootiootequaaari. Moisés Rootasano-ni, cunoori juhua jiyaconaja sohuaca quiquiaari pa tajinia, maja nia cojinuria canaa, maja nia rupenura canaajuhua, tucua nia quiniucua. Jesucristocujajaari cunora tama na cuaqueyajaaja tarinitiaquaaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequaaari juhua niqiriyatu queecujainio supenu pueya, Judiucua, niajaniya tucuaacanio. ¹⁵Naa pa niti Jesucristo cusunucuatej, nojuajaari puetunu Moisés Rootasanojuanaa sanaajaquaaari, maja socua na sesacanura pajaniya. Tarjia, paari juhua caapiqui tiaca quiquiaarini. Paari pueyaracaanu paracaatioojua quijiani. Quiarjia saniniuuja, Jesucristo cusunucua, nojuajaari pa jiyanootiootequaaari jatiqui pa quiniuria juhua niqiriyatu tiaca, mariyata na rupuejaca pa quishacari. ¹⁶Naaratej, janiyari socua camiya nia sequenuni. Cristo cusunucua niyacutesa-

nojinia, nojuajaari Pueyaso jiyanootiquaaari pajaniya, na panishano muerasu pa quiniuria puetunujuanaa, niajaniya tucua, canaajuhua. Naacuajitij, Jesucristocua pa tiushacari, paari juhua niqiriyatu tiaca nerani.

¹⁷Niajaniya tucuaacanaa, niaari juhua tucuaaanu quijiaca quiquiaari Pueyasojiniji. Canaa cutaraari juhua cateca quijia nojuajinijini. Jesucristoori mijiria niquiaari, na nishitiniuria puetunu pajaniyajanaa taa Pueyaso jiyanooniu paniya pajaniyani. ¹⁸Cristo jiyanootiniucua na Que Pueyaso pajaniya, naacuajitij, pa naata pa Que Pueyaso rupenu pa secojosacari nojuaja, mariyata na Sohanuraca pa quishacari, niajaniya, canaajuhua. ¹⁹Jesuucua tiuujiaca nia quishacari quiarjia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio rucoonaa. Quiarjiani, niaari seetanujuanaa Pueyaso pueya cutara. Pueyasoori maninia nia jiitiaajuhua, taa na jiitiaquiaa puetunu na saquiriojosano pueyacuaani. ²⁰Pueyaso pueya nia quiniucua, niaari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pahuatariquianoni, mariyata na sequenu panishano caminiujiunia pueyani, nojoriiri juhua cuno tia pacaarianaa. Saniniuuja, Jesucristoori juhua cuno tia morijiujiana cutara, cuno tia nujuatana. ²¹Pueyasoori naa saquiriojoquiaa Neyanuucua tiuuriquiano pueya, na quiquiorano na tucuatnura. Cuno tia tucuatesacari, tojetaarucujanaa maninia jeenucuasano quiniutianiya pa Jiyaniijia-raari. ²²Niaari naajuhua, Cristo nia rupesacari, niarta Pueyaso pueya nia rupesacarijuhua, Pueyasora, niaari juhua rianaa, tucurunio. Nojuajaari nia morojotaquiaa na tia na tucuatnura, na Sohanu quiquiorano.

Pabloori Pueyaso
jiyaramiquishano taucuaacua

3 ¹Jesucristojiniji cua pohuatanuucua niarta taucua, janiyari cunora nujuatesano quiya nujuatejojuajiniani. ²Niaa naasucuaari niishiyacuaja Pueyasoori cua jiyaramiquiquiaari Jesucristojiniji cua pohuatanura taucua, jiyanooshano nojori quiniuria-juhuaj. ³Tariucuacaanu, majaari pueya niishiniu quijia, Pueyasoori taucua jiyanooniutianiyajuhuj, taa na jiyanoo-quiaacuaa Judiocuacani. Pueyasojuaanaacuaajaari naa jiyasohuaja na miiniu panishano cua niishitiquiaari-tij, taa shusha nio cua naajio coteejajinia cua pohuataa nijaniyacuajani. ⁴Niaa jaara cua naajionee serojore, niaari jiyacari seetanujuanaa niishiniutianiya, janiya cutaraari Jesucristo rupaa niishijiani. Naacujitij, janiyari niishiyani taa jiyanhua maninia nia miishaanutaniyani nocua nia tiushacari. ⁵Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucucani. Na sequenu panishano caminiujunia pueya na niishitiquiaari-jiariuhuj. Pueyaso Sohanucuaajaari cuno canaa niishitiquiaari. ⁶Niajaniya taucuaanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniucua, Pueyasoori puetunu Judiocuacarano na sequesanojuanaa jiyatenutianiya niaaraju-huj. Canaari Judiocuacani. Naajaa, Jesucristoocua nia tiuuniucua, Pueyasoori canaa rupetequiaa nijaniya, juhua niquiriyatu pueyano pa quiniuria nera. Naajuhuj, cunora, Pueyasoori nia niquitioquiaa na Sohanujuhuaj, taa na

sequequiaari Neyanu Jesucristoocua tiuujiacuajani.

⁷Janiyari Jesucristo ruuretaja quiquiaa-rini. Naajaa, jiyanhua cumaacaraca Pueyaso quiniucua, nojuajaari cua jataniquiaari Neyanu Jesucristojiniji pohuatana cua quiniuria. ⁸Jesucristo paraca cua quiniucua tarjia, janiyara, janiya cuaara socua rerequetesano pueyano quiiria puetunu cuarta Pueyaso pueyajinijianaa. Saniniuujia, jiyanhua jiyanootio Pueyaso quiniucua, nojuajaa-ri cua jiyanooquiaari. Cua jiyatequiaariiri seetanu rupajaanaa Neyanu Jesucristoji-niji pohuatana cua quiniuria taucacara. Janiyari cunora Pueyaso shuquiritiaa jiyanhua. Cristo jiitiasano pajaniyara-noni, puetunu cuno casaajanaari pa niishishoojua. ⁹Tariucuacaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuacaanu, majaari na niishitiniu quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano.

¹⁰Pueyasoori tariucuacaanu pajaniyara na niishiriojosano racataquiaari pueyara-caanu tama na niishitijajinijaaja. Saniniuujia, nio pa quishacarini, nojuajaari na niishitiquiaari. Quiarijiani, jiyanhua maninia Pueyaso miishacari puetunu na saquiriojosano pueyajanaa, puetunu jiyocuacaanu cumaacaraca quijiacajanaari niishiya, Pueyasoori seetanujuanaa jiyanhua niishijia cutara. Naacujitij, Pueyaso seya, Satanás, samaruhuanio, nojoriiri tacuriitia shootiaquiaa pajaniya, Pueyaso miiniu-cua maninia pajaniya, niishijia na quiniucua. ¹¹Quiari naataja, Pueyasoori tariucuacaanu na miishocoriquiano na niishiriojosano tohuateequiaari pa

Jiyaniijia Jesucristo cusosacari niyacutesanojinia. ¹²Naacujatij, Jesucristoocua pa tiuuniucua, pa naata juhuajaniya rupueni na Que Pueyaso pa puereyaquiniutia. ¹³Naa Pueyaso miiniucua pajaniyaratej, majaari nioojia nia niquijiotenu Pueyasocujaji nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacaritij, cuno cuaara shiniujiuaria nijaniya, socua pa Jiyaniijia tojjijia nia quiniuria.

**Pablo secojosano Éfeso tiacajinia
quiniaa Pueyaso pueyacuara**

¹⁴Naa Pueyaso muerasu nia quiniuucujahuaj, janiyari mojoquetaquiaani pa Que Pueyaso cua secojonura niaacuara.

¹⁵Nojuacuajaari Que cutara. Puetunu queyajanaari na sesaatiaacuaja. Nojuajaaari puetunu parta Pueyaso muerasujuanaa Que, mijiria quiniaa, tariucua jiyocuaacuanu quiniaa Pueyaso muerasunio. ¹⁶Naa nia Que na quiniuucujahuaj, janiyari niaacuara secojoquiaani, nojuaja cuaara cumaquiria jiyanhua nijaniya na Sohuanuta nioojiajinia. Na Sohuanuuri puetunu pa panishanujuanaa jiitiana.

¹⁷Naajuhuaj, niaacuara secojoquiaanijia, seetanujuanaa nia niishiniuria Jesucristojuanacuajaari nioojiajinia quijia.

Nojuajaari nioojiajinia quiya quiarinio pueyara na jataniniuria nijaniya, nocua tiuujia nia quishacari. Naacujatij, niocua niishiri taa Jesucristo paniya jiyanhua nijaniyani. Naacujatij, majaari nioojia nia niquijiotenu quiniutianiya socua. ¹⁸Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuaj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia

quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeej pa riuriatanu quiniutianiya. ¹⁹Seetanujuanaa, majaari pa naata niishiniu taa jiyanhua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojia nia niishiniuria cuno, na paniniuni. Naa jaara na paniniu niishiri, Pueyasojuanari nioojiajinia quiniutianiya. Naacujatij, niaari tojetaarucujanaa panijaca quiniutianiya taa Pueyasocuaani.

²⁰Naa Pueyaso miiniucua maninatej, nojuaja cuaara shuquiritiasaaria. Naa jiyanhua na cumaacata na poonijiosacari poojiajinatej, nojuajaari na naata miiniu socua jiyanhua queraatia pa masenanoinijiji nojuaja, pa niishiriojisanoinijinio. ²¹Puetunu quijiacajanaa cuaara niishiria Pueyasoori jiyanhua maninia. Nojori cuaara nia niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuaara nia shuquiritiasaaria pueyaracaanutej!

**Pueyaso Sohuanu pa jiitiasacari,
paari rupuetootesano quijiani**

4 ¹Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojjijia nia quiri, seetanujuanaa maninia na muerasu nia quiniuria. Pueyasocujajaari nia saquiriojoquiaari nia maninia na muerasu nia quiniuria. ²Majaari niarta Pueyaso pueya rerequetejaca nia quiniu. Maninia miitioojuaca nia quiriquia. Puetunu casaajanaa rejeretajaca nia quirijiuhuaj. Naa jiuujiaatioojuaca nia quiri nia panitioosacari. ³Naa Pueyaso

jiyanootootesacari niajaniatej, pueyara-
caanu nia jiyanoootoore, juhuajaniya
nioojia quiniuria juhua rupuetootesano.
Pueyaracaanu naa nia miiri Pueyaso
Sohuanu cumaquishacari niajanija. ⁴Naa
quiija nia quiri pueyanaa, niquiriyatu
cuaqueyaraca pa quishacari pa Jiyaniijia-
ra, mariyata niquiriyatu Sohanuraca pa
quishacarijuhuaj. Naa Jesucristoocua
tiuuijaca pa quishacaritij, Pueyasoori
puetunu pajaniyajanaa rijionutaniya,
pueyaracaanu na shuriucua pa quiniuria.
⁵Puetunu pajaniyajanaari niquiriyatu
Jiyaniijiaracani. Nojuajaari Jesucristo.
Naajuhuaj, puetunu pajaniyajanaari saaja
Jesucristo rupaacua tiuuijacani, maja
tamonu rupaacua. Naajuhuaj, puetunu
pajaniyajanaari moojinia tiuquinijosaa-
quiaarini, Jesucristo pa jiyatesacari pa
Jiyaniijia. ⁶Naajuhuaj, saa niquiriyatu-
jua Pueyasoori quiya. Nojuajaari puetunu
Neyanuucua tiuuijacajanaa Que.
Nojuajaari puetunu na tojjijiacajanaa
Jiyaniijia. Nojuajaari puetunu na
pueyajanaa poonijioteya na panishano
nojori miiniuria. Puetunu na muerasu
jiuuijaajanaari na quiquio.

⁷Saniniuujia pueyanaa, puetunu
pajaniyacuaajaari tari jiitiaa tamaatia
poonijosano pa miiniuriani, teyano
Cristo niquitionu paniquiaari pajaniya-
cujani. Naacujitij, puetunu
pajaniyajanaari maja pa niishiniu miiniu
saa niquiriyatu casaaja. ⁸Tariucuaanu
Pueyaso Rupaa naajiotasanojiniji, paari
niishiyani Pueyasoori na Sohanu
niquitionu paniquiaari na pueya. Cunora
naa sequeya Jesucristojiniijiri:

“Na quioosano pueya tacataquiaari-
hua jiyocuaanuuri. Nareja na
niquitionu panishano casaa serota-
quiaari na pueyari”.

⁹Jaara sequeya “tacaquiaariuhua”,
cunojiniji paari niishiyani nojuaja
jiyocuaanuui rosequiaari coteenu,

taraatia mijiria na mosaanura pocuara.

¹⁰Nojuajani, jiyocuaanuui rosequiaarini,
nojuajaari tojetaarucujanaa jiyocuaa-
nu tacaquiaariuhua, Jiyaniijajanaa na
quiniuria na Que shuriucua. Tacaquiaari-
ri puetunu jiya cajiniocujanaa na
mishiniuria na cumaacata, puetunu
jiyajanaanio. Naacujitij, nojuajaari
puetunu tiqiyocujanaa quijia. ¹¹Nojua-
cuaajaari noojiaqueya na saquiriojosano
pueyajiniijinio jiyatequiaari na jiyami-
quishano pueya nojori quiniuria.
Saniniuujia, tamasa jiyatequiaariiri
Pueyaso sequenu panishano caminiuju-
niaa nojori quiniuria. Saniniuujia,
tamasa jiyatequiaariiri Jesucristo
niishiyashijia niquiara poojotanaa
nojori quiniuria, Pueyaso jiyanooniuria
nojorijihuaj, Jesuucua nojori tiuushaca-
ri. Tamasa jiyatequiaariiri na tojjitajaca
pueya jiitanaa nojori quiniuria. Tamasa-
ca jiyatequiaariiri na rupaa niishitiojanaa
nojori quiniuria narta Pueyaso pueyara.

¹²Naacujitij, Jesucristoori na Sohanuta
cumaquiquiaa cana na paniyani, puetunu
tamaatia na miiniu panishanojuanaa
nojori miiniuria. Naa na pueya cumaqui-
quiaa na Sohanutaari na saquiriojosano
pueya tiuuniuria nocua, nojori cumaqui-
shaanurajuhuaj. Naa Jesucristoocua
tiuuijaca pueya canesacari socuatej,
Jesucristo cuaqueyari canequiaa.

¹³Jesucristora poonijionaa pueyari naa
poonijioquiaatej, paa cuaara tojetaaru-
cujanaa pa Jiyaniijia tojjijia
quirijiaatijia, juhua rupuetootesano pa
quiniuria. Cristo pueyari naa poonijio-
quiaa Pueyaso Sohanu cumaacata, paa
cuaara seetanujanaa Pueyaso Niyanu
niishijia quirijiaatijia. Naacujitij, paari
tojetaarucujanaa jeenucuasano
quiniutianiyan, seetanujanaa juhua
Jesucristo pa quiniuria. ¹⁴Naacujitij,
majaari tari pa quiniu quiniutianiya
juhua naatujua. Niaacuaajaari niishiya

naatujooriiri na niishiriojosano jatanijia ritia. Noojia niqijijotejajaariuhuaj. Naa juhua tariucua cumueeca mashaja pa quishacaritij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanhua sapojonu niishijiaca, nojori tojitiyajaca na tashuquootenura Pueyaso-jiniji. ¹⁵Nocuaij pueyanaa, Pueyaso Rupaata pa cumaquitoojore seetanujua-naa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶Pueyanaa, niaacuajaari niishiya, puetunu pa cuaqueyajiniacuma casaa pa jiitiasanojuanaari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jiitiasano casaa. Naacuajitij, puetunu Pueyaso muerasujuaanaa jaara tama na poonijosanojuaja miiquiaa maninia taa pa Jiyaniijia panyiacuajani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuaanaa panitioojuaca pa quiniuria.

Cristoocua tiuujiacaari quiarinio pueya

¹⁷Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuu-cua. Naajuhuaj, nojoriiri tama na panishanojuaja mijiaca, najuhuana casaacua nojori jiaatianuucua. ¹⁸Nojoriiri naa quijiacatej, juhua ninishiqui nojori niishitijaca quiniuucua. Nojoriiri seetanujuaana niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari

nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. ¹⁹Naa pueyara-caanu sesa nojori mijionuucaatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaja mijiaca. Nojoriiri puetunu sacuaaatia casaajanaa miiniuucua jiyartuucuno. ²⁰Niajaniya saniniuujia, majaari naa nia niishitiojosaanu quiquiaari Cristojiniji, naa sacuaaatia mijiaca nia quiniuria. ²¹Niaa jaara Jesujiniji tojiquiaari, niaacuajaari niishiquiaari na rupaari seetanu rupaajanaa cutara. Niaacuajaari na rupaajiniji niishitiojosaquiaari maninia mijiaca nia quiniuria, sesa nia miiniu nia tarinitianurajuhuaj. ²²Pueyanaa, pa toque mocua jaara mocuaatia jaanure, paari ritia na jocuajani. Naa nia jatarejuhua sacuaaatia miiniu nia niishishano. Sesa nia miiniu panishanoori tama nia sapojoquiaarijiaaja nia sesa mijiaca nia quiniuriatej. ²³Quiarijia saniniuujia, sesa nia niishitijaca nia jatara, maninia niishitijaraca nia quiniuria, maninia jiuujiaracanio. ²⁴Seetanujuaana juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio jiuujiaraca nia quishacaritij, seetanujuaana juhua Pueyaso pueya nia quiriqia, maninia mijiaca, tojetaarucujajanaa sesa miyashijiaca. Naa maninia nia quiniuni, cunoori seetanujuaana Pueyaso Rupaa nia tojinuuucua.

²⁵Naacuajitij pueyanaa, majaari socua cuaracashijionuujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuaara quiri seetanujuaanaa.

²⁶Niaa jaara juaatishaare, tama nia cuaqueyajaaja nia cojuare maja nia

juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu.
²⁷Ritia nia jeecatoore, Sesaaca mariqui sesa nia miitiriiri nia jiyanoaquisahacari.

²⁸Nio nia tojirijuhuj. Cante nohuase-jojua quiyajaani, cuaara tarinitiaara nohuasejonu. Saniniujia cuaara poonijioora tama na numatucutataaja cutara. Naacuajitij, nojuaja na naata na jiitiasanojiniji nareja niqutionu tamasa-ca, cante na panishano jiitiaquiiani.

²⁹Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonu-juhuj. Saaja maninia pocuajaca nia quiri cutara. Naacuajitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuj. Naacuajitij, nia naata nojori shiniujuniu saaja Pueyaso tojijiaca nojori quiniuria. ³⁰Majaari sesa mijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocujajaari juhua na sesa naajiota-quiaari poojiajinia na Sohuanuta. Naacuajitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹Pueyanaa, majaari jiyanoashijia nia quiniu. Seetanujuanaa jiyanoojiaca nia quiri cutara. Majaari tamasaca shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaaja nia quiniu, nia juaaniutia nia sesacanura nojuaja. Naacuajitij, puetunu juaaniujianaa nia tarinitiare, puetunu sesa nia miiniujia-naanio. ³²Saniniujia, maninia miitioojuaca nia quiri. Taraajetoojuaca nia quirijuhuj. Naajuhuj, jiyanoootioo-juaca nia quirijuhuj, taa Pueyaso jiyanooquiaari pajaniyacuaani, Neyanuu-cua pa tiuushacari.

Seetanujuanaa juhua Pueyaso pueya nia quiri

5 ¹Pueyanaa, niaacuajaari Pueyaso panishano muerasuniyojua. Cunora, pueyaracaanu juhua nojuaja nia quiniuria nia saniniujiuri. ²Puetunu nia miishanojuanaa nia miiri nia paniniutia, taa Jesucristo paniquiaari pajaniyacuaani. Jiyanojua na paniniucua pajaniya, nojuajaari tama na cuaqueyajaaja tarinitiaquiaari pa niti na mosaanura. Naa na miiniuucuatej, nojuajaari Pueyaso shuquiritiquiaari jiyanojua. Na miishanoori juhua shanohua jaanutaja quiquiaari Pueyasora.

³Pueyaso pueya maanujinijinio nia quiniucua, majaari nia camishoo maaji nia numuetucunu, maajishuriu, casaanio. Cunoori jiyanojua sacuaraatia Pueyasora. Majaari quenaaja jiyano sacuaraatia casaajiniji nia pocoojonu. Naajuhuj, majaari tamasaca jiitiasanoocua jiaatiajaca nia quiniu. ⁴Majaari najuhuaana sacuaraatia pocuajaca nia quiniujuhuj. Majaari najuhuaana nia niti nia taquirio-cuatenu juhua maninia pocuaja. Naajuhuj, majaari sacuaraatia puenuju-nujuaca nia quiniu. Puetunu cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhua-queetanura Pueyaso. ⁵Niaacuajaari tari niishiya, cante juhujaniya na camishoo maajipohua numuetucujujani, maajishu-rihuanio, nojoriiri jiyanojua taraatia quiniutianiya. Pueyaso jiitiasano na tojijiaca pueyaranoni, majaari na quiniu quiniutianiya naa mijiaca pueyara. Naa taraatia miishaanutaniyajaariuhua puetunu tamasaca jiitiasanoocua jiaatiajajanaa. Pueyasora, jiyano pueyari jiyanojua sesa, juhua juaashiquiata shipinijosano pueyasohua secojonujuaca. ⁶Naacuajitij pueyanaa,

majaari nia shanacunu tamasaca sapojonura nijaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocuajaari juaatishaare. Tari saniitioya na tojiyashijiaca pueyari. ⁷Cunora pueyanaa, majaari quenaaja naa sacuaraatia miijiaca nia cojiniu.

⁸Pueyaso niishiyashijiaca nia quishacarija tarija pueyanaa, niaari ninishiqui quijiaca quiquiaari. Quiarija saniniuujia, pa Jiyanijia rupuejaca nia quishacari, Pueyasoori nia jiyatequiaari cuhuashiqui quijiaca nia quiniuria. Cunora, seetanujuanaa maninia miijiaca nia quiri, juhua cuhuashiqui quijiaca. ⁹Paa jaara seetanujuanaa cuhuashiqui quijiaca quirini, paari maninia miijiaca quiniutianiyan. Naajuhuj, paari tojetaarucujajanaa sesa miyashijiaca quiniutianiyan. Paari seetanujuanaa Pueyaso Rupaa tojiijiaca quiniutianiyajuhuj. ¹⁰Naajuhuj pueyanaa, niaa cumaati niishiya, ¿puetunu nia miishanojuanaate pa Jiyanijia maniniucuasano, maja soj?

¹¹Majaari ninishiqui quijiaca nia cojiniu, nojori jaara sesa miya. Saniya nojori nia nacasure juhuari. Maninia nia miishanojini, nojoriiri niishiniutianiya nojori miishanoori tojetaarucujajanaa sesa.

¹²Jiyasohua nojori miijosano sacuaraatiaari tojetaarucujajanaa jiyanhua cararaatia. Pohuataaquishoo. ¹³Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴Pueyaso Rupaacuaaari nojori jiuujia cuhuataquiaa na cumaacata, cuhuashiqui quijiacara nojori na jataniniuria. Cunora, naa naajiotasano quiyari tariucuacaanu Pueyaso Rupaajinia:

“iMaqueyanonaa, quia niucuaire!
iMacunucua tajiniji quia sanere,

Pueyaso Jiyarosano cuhuatanura quiajaniya!”

¹⁵Naacujitij cua panishano pueyanaa, tama nia cuaqueyajaaja nia cojuare jiyanhua, seetanujuanaa maninia miijiaca nia quiniuria. Majaari juhua niishiyashijiaca nia quiniu juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶Nio pa quishacari, sesa miiniuari socua caneya puetunu juucajanaa. Majaari pa niishiniu taate tariqui quiniutianiyan. Naaratej, jaara pa naata quiriquia maninia pa miiniuria, maninia pa miiri puetunu juucajanaa. ¹⁷Majaari moseeca nia quiniu. Maninia nia niishiri casaa pa Jiyanijia paniya nia miiniuriani.

¹⁸Naajuhuj, majaari nia mashaasequejenuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishiniuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniurijuhuj. ¹⁹Naa Pueyaso Sohuanu nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhuj, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyanijia nia shuquiritiare puetunu nioojiatajanaa. ²⁰Pueyaracaanu puetunu casaarajanaa pa Que Pueyaso nia sequere “paacarasho” pa Jiyanijia Jesucristoocua tiuujia nia quiniuucua.

Taa quijia pa quiyani Pueyaso tojiija pa quishacari

²¹Pueyanaa, maninia tojitiojuaca nia quiri, taa pa Jiyanijia Cristo paniyacujani. Nojuajaari pa Jiyanijia cutara.

²²Maajipohuanaa, nia niyaca tojiijiaca nia quiri, taa pa tojiquiaa pa Jiyanijia-

cuaani. ²³Nia niyacaari juhua nioojia quiya niaara, taa Jesucristo quiya na saquirojosano pueya jiuujiacuaani. Nojuajaari pocuaji Tacuna, juhua na cuaqueya pa quiniucua nera. ²⁴Naacua-jitij, taa Jesucristo saquirojosano pueya na tojtiajaca quiyacuaani, maajipohua cuaara naa pueyaracaanu neyaca tojtiajaca quiirajuhua.

²⁵Canuunaa, nia niquiocohua nia paniri taa Jesucristo na saquirojosano pueyaro paniquiaaricuaa jiyanoahuani. Nojuajaari cunora tama na cuaqueyajaaja tarinitiaquiaari na mosaanura. ²⁶Nojuajaari naa miiquiaariti seetanujunaan nerano pa quiniuria. Tojetaarucujanaan maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷Paa jaara tojetaarucujanaan tari jeequejosano quirini, pa Jiyaniijajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucujanaan sesa miyashijia quiniutianiyani. Paari seetanujunaan shanohua niquishano quiniutianiyani, juhua camishocoriquiano maniniushitishano niyacoo, tojetaarucujanaan jiyanoahua cohuaque toqueraca. ²⁸Pueyanaa, taa nia paniyacuaa tama nia cuaqueyajaajani, naa nia paniri nia niquiocuajuhua. Cante necocua panijiani, nojuajaari juhua tama na cuaqueyajaaja pania. ²⁹Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquirojosano pueyacuaani. ³⁰Puetunu na saquirojosano pueyajanaari juhua na cuaqueya nera. Paacuajaari na cuaqueyajinijinioni. Naaratej, nojuajaari maninia pa cojuaquiaa. ³¹Cunora naa naajiotasano quiyari tariucuaaanu Pueyaso Rupaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³²Pueyasojuaanaacujaari pa niishitiojiquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojia, puetunu Pueyaso saquirojosano pueya maanujuaanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijia nia quiri juhua tama nia cuaqueyajaaja. Naajuhua, puetunu maajipohujanaan cuaara neyaca tojijia quiiria.

6 ¹Muerasunaa, pa Jiyaniijia tojijia nia quishacari, nia queya tojijia nia quirijuhua. Naa jaara naa miiritij, cunoori jiyanoahua maninia Pueyasora. ²Tariucuaaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijia nia quiri, nia nucuanio. ³Naa nia miiritij, pueyaracaanu shuquiriaatia na quiniuria, pueyaracaanu nia rishiniuria mijiria, niaa cuaara saaquianoshirijiaatijia”.

Nio rootasanoori coteenujuanaa rootasano tee Pueyaso sequeyacuaani taa na tojtiajaca na miiniutianiya maniniani.

⁴Niajaniya saniniuujia pueyanaa, majaari nia niquiohwa nia juaatijionu najuhuanaj. Nojori nia canashitijiore maninia. Nia niishitiojore maninijuhua. Nojori nia nacasurejuhua. Jaara nia tojtiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵Niajaniya poonitijosano pueyanaa, mijiria nia camaruhua tojtiajaca nia quiri. Majaari nojori nia rerequetenu. Puetunu nojori sequesanojuanaa niajaniya nia miiri nia puerenuta, niaa mariqui saniitiosaareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora. ⁶Majaari maninia nia poonijionu saaja nojori niquishacari niajaniya, nojori shuquiritia-nura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Naa jaara naa maninia poonijionuujuaca quiriquiatej, niaari Pueyaso panishano miyajuhuj. ⁷Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸Niaacujaari tari niishiya, pa Jiyaniijia Jesucristoori puetunu pajaniyajanaa niquitionutaniya maninia pa miiniuucua mijiria, poonijioteseano pueya, camarnuuju pueyano.

⁹Niajanijajuhuj seya jiitiajacadanaa, nio sequesano nia tojiri. Maninia nia jiitiare nia poonitijosano pueya. Majaari na miananajonu. Nia niishirijuhuj, niaari mariyata niquiriyatu Jiyaniijiaraca, niajaniya, nojorijuhuj. Nojuajaari jiyocuacaanu quijia. Naaratej, tamonu pueyanoori maja rimiajata nera, narta pueyanojiniji.

Taate pa naata Sesaaca nujuatanuni

¹⁰Quiarjia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jyanohua cumueeca nioojia quiniuria jyanohua na cumaacata. ¹¹Puetunu Pueyaso niquitiosano casaajanaa nia cushiyore juhua toqueya, Sesaaca sapojiaquiniuucuj niajaniya. ¹²Pueyaso pueya pa quishacari mijiria, majaari pa quiaquetoojonu

quiquiaa pueyanota. Pa coopueeri maja pueya. Nojoriiri cumaacaraca quijiaca jiya cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacujitij, nojoriiri cumaacaraca, ninishiqui quijiaca pueya nojori jiitianura. Nojoriiri Pueyaso paraajuhuj. ¹³Naaratej Pueyaso pueyanaa, puetunu Pueyaso niquitiojosa-nojuanaa nia paracata nia miaquetoojotaqueya nia cushiyore. Naacujitij, sesashiquiari niocua na nujuatare, Sesaaca saniniujiushacari niajaniya. Naa jaara naa nioojia jeenucua juhucarijia puetunu Pueyaso casaatajanaatej, niaari nia paraa nujuatajaca quiniutianiya.

¹⁴Pueyanaa, niaacujaari niishiya taa miaquetoojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriquiajanaa na mishiquiojonura cashiicuj. Naajuhuj, na sapatuhua cushiyonuujaariuhuj. Na nareenee pootujaari, nocuj nia nujutajara cashi. Naajuhuj, na naca na cojuatajara, cumoco casaa cushiyonuujaari. Na nijiniaquetucuj mueruu pootujaajaariuhuj.

Pueyaso pueya pa quishacari saniniujia, tama nia cuaqueyajaaja nia jeenucua Pueyaso casaata. Naacujitij, seetanujuanaa Pueyaso Rupaa niishijia nia quiri maja nia sapojosanaura. Cunoori juhua pa cajiniocua camarucuj casaa saniniujia. Pueyaracaanu maninia mijiaca nia quiri, nioojia nia cojuanura Sesaacaacuj, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano.

¹⁵Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuanura

Jesujiniji. Naa nia pohuataretej nojori niishiniuria Pueyasoori nojori jiyanooni paniyajuhuj. ¹⁶Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷Nia niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasooacuaji. Naajuhuj, Pueyaso Rupaa nia niishiri maninia. Cunocujaari Pueyaso Sohuanu nijiniaquetucua mueruu, pueya jiuujiajinia na poonijionura. ¹⁸Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari niajaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuarajanaa. ¹⁹Naajuhuj, cucuara nia secojonuure, Pueyaso niquitionura janiya na niishitija, maninia cua pohuatanura Jesujiniji cua puereyaquiniutia. Cucuara nia secojorejuhuaj, maatia cua niishitiniuria pueya, Pueyasoori puetunu pueyajanaa jiyanooni paniya saaja Jesucristoocua

nojori tiuushacari. ²⁰Pueyasojuanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niquiara. Janiyari cunora niya nujuatejojuajinia morotasano quiyani. Naaratej, cucuara nia secojore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹Pa panishano Tíquicocujaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa Jiyaniijia. ²²Janiyacujaari cunora niaacua na jiyaroyani, nioojia nia cumanijianura canaajiniji nia tojishacari, taa canaa quiya niyani.

²³Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhujaniya nia quiniuria. Nojori cuaara nia jiyateera panitiojuacarajuhuj, seetanujuanaa Jesucristoocua tiuujia nia quiniurajuhuj. ²⁴Naajuhuj, Pueyaso cuaara puetunu pa Jiyaniijia panijiacajanaa cumaquiiria na Sohuanuta, shuquiriaatia nojori quiniuria, cuno pojori, canapuete seetanujuanaa Jesucristo panijiacacujani.